

Cingzngeih Ndaw Ndoengfaex

林间友谊

It

Duz roeg iq ndeu, youq gwnz faex sangvidvid, de miz rongz raeurub, miz bwn ronghsien, de couh yienghneix vaiqlag swnghhoz. Youq henz faex miz aen ranzfaex iq ndeu, ndaw ranz youq miz boux baengzyoux ceiq ndei de, heuhguh Genj • Swnh.

Miz hwnz ndeu, aen ranzfaex iq Genj • Swnh mbouj rox vih maz dawz feiz lo, feizhung coemh dawz ndoengfaex seiqhenz aen ranzfaex iq, hoeng duzroeg iq moengz-loengz mbouj rox. Feizmbaw yubyub coemh goenq nyefaex cengidingj rongzroeg haenx, duzroeg iq lij fangzhwnzloq haenx doek roengz ndaw feiz bae……

Haetromh, duzroeg iq ndiu gvaqdaeu, moklox mumjgyumq hopheux youq henz ndang. De ngeux yawj seiqhenz, raen bonjfaenj cingq ninz youq ndaw aen hab iq ndeu, gwnz ndang goemq diuz sujbaq mbaeq iqetet ndeu. Hai da yawj bae, gij ngauez Genj • Swnh yaep raen yaep baex cwgoemq youq ndaw mokmbang, geu nditrongh ndeu laeuh gvaq aen ranz deng coemh ndaemndat haenx cik haeujdaeu. Duzroeg iq maezvaeg ngonzyawj aen ranz iq boedbaih loemqlak haenx, sawqmwh dingqnyi rog cueng miz geij duz roeg doiq rwz sapsap: “Lwnh sou nyi, haemhlwenz dwg Genj • Swnh hawj aen ranzfaex iq neix dawz feiz bw!” ” W, couh dwg bog feiz neix coemh benq ndoengfaex neix lo, aen rongz duzroeg ninz ndawde

haenx hix coemh liux lo.”…… Gyoengq roeg gangj sat couh mbin deuz lo, louz duzroeg iq gyaxgedged muenghyawj rog cueng, ndaw hoz huj Genj • Swnh yaek dai. De ndwn hwnjdaeu siengi bek fwed mbin deuz, hoeng roxnyinh diuzfwed dotngubgub, cij ndaej louz youq ndaw ranz Genj • Swnh yw sieng.

Ngeih

Mboengq yw sieng haenx, Genj • Swnh doiq roeg iq ciuqgoq ndaej gig saeqsim. De vih roeg iq bwh ndei cijvaiz, mienhbau, sujbaqnat, lij caen fwngz bang roeg iq swiq ndang, ngoenzngoengz cungj buenx duzroeg iq. Hoeng, roeg iq cix mbouj lingxcingz, cungj dwg daegdaengq dwk bok cijvaiz, hix doiq Genj • Swnh mbouj leix mbouj langh, ciengzciengz hawj de dinfwngz luenh caez.

(caengz sat)

(Dungz Vanjdingz raiz; Goenggen hoiz)



Lwgvuengziq

小王子

bouxraiz Swng' aihgwzsuhbeilij bouxhoiz Luz Fwncangz

圣埃克苏佩里 著 卢奋长 译

Lwgvuengziq gag naemj naeuz: “Aen singgiuz neix geizheih lai! Youq gizneix mbwqlinlin, mbouj miz vunz caemhdoh guhcaemz. Vunz gizneix mbouj mizyinx saek di nauq, bouxwnq gangj gijmaz de cix riengz laeng gangj gijmaz……Youq gwnz singgiuz gou, miz duj va ndeu, baezbaez cungj dwg de aj bak gangj vah gonq……”

Ngeihcib

Lwgvuengziq byaij ndaej nanznanz liux, byaij gvaq diegsa, ngamzrin caeuq dieгнаe, doeklaeng cix byaij daengz ga roenhung ndeu, ga roenhung neix doeng bae daengz biengz bouxvunz.


“Sou ndei!” Lwgvuengziq naeuz.

Lwgvuengziq ndwn youq baihnaj bakdou suenva, ndaw suenva vameizgveiq ndok langh va hai.

“Mwngzndei!” Vameizgveiq naeuz.

Lwgvuengziq cim doenghij dujva neix, gyoengqde caeuq duj va swheij doxlumj dangqmaz.

“Gyoengqsou dwg va maz ne?” Lwg-



vuengziq geizheih dwk cam naeuz.

“Dou dwg vameizgveiq.” Vameizgveiq han naeuz.

Seizde, Lwgvuengziq doeknaiq raixcaix. Ngoenzgonq duj va Lwgvuengziq naeuz de nyi, lajmbwn neix gag miz duj va de ndwi. Hoeng, youq aen suenva neix, miz haj cien duj va caeuq duj va de doxlumj liux.

(25)



Gienh Saeh Neix Gamjdoengh Gou

这件事感动我

上林县大丰镇中心学校六(3)班 Vangz Yizcan/黄日灿

Seizhaenx dwg gyanghaemh seizhah ndeu, mbwn dauq liengzseuseu, saek seiz miz di rumz ci daeu, cwxcaih dangqmaz. Gou angqvauvau bae caeuq gyoengq nyeziq guhcaemz.

Sawqmwh, mbaq gou deng aen ngaudiet soem youh raehrwd ndeu gvat hai aen baksieng, lwed hoengzsien mbouj dingz daj baksieng conh okdaeu. Mbei dek le gou daejnganga hwnjdaeu. Raemxda doekboegboeg, lumj raemxdah bongh ok haenx saek mbouj liux. Gyoengq doengzdoi cix roxdaengz cingzgvang yungyiemj, yiengh-neix miz mbangj louz roengzdaeu nai gou, miz mbangj buet bae lwnh daxmeh gou.

Dingqnyi aen siusik neix, daxmeh doeksaetyat, naj-saek cungj bienq liux, lumj mbin dwk buet gvaqdaeu aemq gou bae yihyen, aenvih mbouj ndaej gwih ci couh deng buet bae daengz yihyen, cix caengz yietnaiq. “Mbouj youqgaenj, canghyw duk couh ndei lo.” Gou cix foengx dwk daejngaungau. Gou roxnyinh daengz, gou daej ndaej yied rengz, daxmeh buet ndaej yied vaiq, baihlaeng de, najbyak de, naj de, cungj dwg lwgrou, gou seizhaenx mbouj rox de dwg raemxhanh? Raemxda?

Nyib baksieng seiz, daxmeh souj youq bakdou gizcinsiz, mbouj bae saek lengq. Bakdou mbat hai, daxmeh couh bongh gvaqdaeu umj gou gaenjgaenj dwk, haibak couh cam: “Lwg a, mbouj miz saeh le ha? Ndei di caengz?” Aenvih miz ywmaz, gou gangj mbouj ndaej vah, mboujgvaq leix auqmanz ndaej ngaekgyaeu, longxriu didi. Daxmeh yawjraen yienghceij gou, cuengq gaemz heiq, cungsueng cuengqsim lo, ing youq bangxcienz riu dwk, yaep he lwgda fathoengz, raemxda doekboegboeg. Yaepyet, sim gou deng bungq lo.

Ma daengz ranz, gaengq dwg gyanghwnz lo. Daxmeh yienznaeuz baeg yaek dai lo, hix coengh gou vuenh buh saeg buh, caemhcaiq lij guh vanj dang hawj gou gwn. Yawjraen daxmeh youq bakcauq caeuq ranzding buet bae buet dauq, sim gou miz cungj gamjsouh ndeu gig geizheih. Dang guh ndaej lo, daxmeh bungj gvaqdaeu naengh youq henz ndang gou, doq boq doq bwnq gou gwn, ndang gou yaep he raeu hwnjdaeu lo. Seizneix, daj bak gou lae haeu conghoz mboujdan dwg dang, vanzlij dwg cingz maij lwg rimradrad.

Ok saeh liux, dwg daxmeh lienzmuengz dawz gou soengq daengz yihyen, dwg daxmeh itcig buenx gou, dwg daxmeh itcig gvensim ciuqgoq, de vih gou yousim, cungj mbouj geiq swheij lo.

Gou yawj fajnaj daxmeh baegnuegmnguem, ndaw riunyumj miz gyaex, lwgda miz maij rimradrad. Raemxda gou doekboegboeg……

Gij maij daxmeh hung lumj mbwn, miz cienz cawx mbouj ndaej. Gij saeh de guh haenx cungj gamjdoengh daengz gou.

(lauxsae son'gyauq Vangz Gveiyangh/黄桂香)